

# 2023 Wasserratta

In Katar hends denn endlich könna tschutta  
Hend alli törfa koh, nu nid di Blutta  
Dia Gschicht isch schu frappant, as isch a grossi Schand  
Wär weiss vielleicht bewirbt sich nögscht'mol Grönland!

Glichstellig, Klimaschutz und anderi Zeicha setza  
D'Realität – loht sich durch nüt ersetza,<sup>2</sup>  
Chef, dr Urs isch neu d'Ursina, nit verpassa,<sup>2</sup>  
Oh guat seisch'es – muass grad dr Lohn apassa!

Min Frauuarzt, hät mi uf dr Stross erkennt  
Seit d'Kollegin tuan doch nid a so verklemmt  
Wenn's dr piinlich isch – muasch halt überlegga  
Und in Zuakunft – längari Röck alegga!

Eltara vu hüt tüan eim schu leid  
müand doch recht flexibel sii  
mit Biena und da Bluama gohts no  
doch mit dem allei isch's hüt verbii,  
denn hüt gits au no - Biena, und Biena  
Bluama au mit Bluama allei  
Biena - frühaner Bluama  
Bluama wo hüt Biena sind

Biena gseht hüt us wia Bluama  
und trotzdem hends a Stachel dra  
Bluama gseht us wia na Biena  
will aber gliich kei Stachel ha

As git nid nu bunti Bluama  
au Biena gits hüt halt in bunt  
Ihar sägend miar segen vu geschter  
sind aber froh, dass üsri Müater, no echti Frauua gsii sind

I kenn' a Klima-Aktivischt  
als "Renovate" bekannt  
isch zerscht fascht worda Polizischt  
hüt isch'er a Vagant  
Er kläbt sich neu mit Liem uf d'Stross  
denn d'Welt muass das jetz gseh  
Macht nüt wenn nit, uf d'Arbet kusch  
Denn ds Klima bruchts, dsche dsche....

Ihar Aktivischta, losen zua  
miar hend eui a Idee  
Kömmend doch ins Bündnerland  
erscht noch dem ganza Schnee  
Denn könnder grad uf d'Alpa goh  
und kläbend eui uf d'Stross  
D'Wölf dia freut's, und d'Puura sind  
dr Nutztiar-Riss bald los!

Ganz trurig seit dr Kolleg – bim a Biar  
Sid 3 Täg, redet d`Frau nüt meh mit miar  
Bis froh, nimm das hii, lass'es gelta  
Glaub mer hützutag – sind dära Fraua selta!

Keit a Stern-Schnuppa vum Himmel und lüchtat hell  
Schätzli wünsch dr öppis, aber würkli schnell  
As wär so schön du näm'sch mi meh in' Usgang mit  
Oh Scheisse Schätzli – s'isch nu a Satellit!

Dr Synergia-Vorplatz isch total verschmiart  
Ma weiss nid recht - was isch denn do passiert  
Miar hend denn no gfrogt kha bim Kantun  
das seg dr Reschta - vum Rumantsch Grischun

Dr Gasmaa lüttat – und klopft an dr Tür  
Er bringt d`Rechnig – kann jo nüt drfür  
Kasch nid spöter kho – frogt Sie im Negligé  
Dr Strom-Maa will – halt no a bitzli meh!

Üsri Landwirtschaft verfechtets jo ganz kühan  
viel Scheisse, gäbi eba au viel Grün  
Öpa eina findet das – ganz verkehrt  
I'r Politik – isch's aber umgekehrt!